

07 May 2025

समे .18:15 Hrs

<><><><><><>

Headlines

- आपरेशन सिंदूर दौरान पाकिस्तान दे नागरिक आर्थिक जां सैन्य ठकानें गी नशाना नेई बनाया गेआ। कार्रवाई दौरान छड़े आतंकवादी शिविरें गी निशाना बनाया गेआ। प्रधानमंत्री नरेंद्र मोदी होरें सशस्त्र बनें दे शौर्य दी सराहना कीती।
- केंद्री गृह मंत्री अमित शाह होरें बन्ने आहले प्रदेशें दे मुखमंत्रिण, राज्यपालें, उप-राज्यपालें, डीजीपी ते मुख सचिवें कन्नै उच्च सतह दी बैठक लाई।
- उपराज्यपाल मनोज सिन्हा होरें जम्मू-कश्मीर दे बन्ने दी स्थिति दा जायजा लैता। उनें डिप्टी कमिशनरें गी हिदायत कीती जे ओह इनें ग्राएं दे लोकें गी सुरक्षित थाहरें पर मुंतकिल करन।
- मुखमंत्री उमर अब्दुल्ला होरें बन्ने आहले जिले दी स्थिति दा जायजा लैने लेई एमरजेंसी बैठक लाई। बन्ने आहले जिले लेई 5 करोड़ रपे फौरी जारी करने दे निर्देश दित्ते।
- कैबिनेट नै आई.आई.टी दे विस्तार गी मंजूरी दित्ती। उपराज्यपाल होरें शैक्षणिक ते अनुसंधान ढांचे गी बढ़ावा देने लेई प्रधानमंत्री हुंदा धन्नवाद कीता।

<><><><><><>

Op. Sindoor

भारती सशस्त्र बलें पाकिस्तान ते पाकिस्तान दे नजैज कब्जे आहले जम्मू ते कश्मीर दे किश इलाकें च अद्धी रातीं दे बाद आतंकवादी ढांचे गी नशाना बनांदे होई ऑपरेशन सिंदूर गी अंजाम दित्ता ऐ। रक्षा मंत्रालय नै इक बयानै च आखेआ ऐ जे 9 आतंकवादी ठिकानें गी निशाना बनाया गेआ। इस बारै अज्ज नमीं दिल्ली च प्रेस वार्ता दा आयोजन करियै देश ते दुनिया गी आप्रेशन सिंदूर बारै तफसीली जानकारी दित्ती गेई। इस मौके विदेश सचिव विक्रम मिसरी होरें दस्सेआ जे भारती एजेंसिएं गी जानकारी ही जे पाकिस्तान दी तरफा औने आहले आतंकवादी होर हमले करी सकदे न, इस करियै भारत नै उनेंगी पैहले गै मारी मकाने दा फैसला लैता। उनें दस्सेआ

प्रेस वार्ता दे दौरान विंग कमांडर व्योमिका सिंह ते कर्नल सोफिया कुरैशी होरें आप्रेशन सिंदूर दी कार्रवाई दे वीडियो दी मदाद कन्नै पूरी ते तफसीली जानकारी दित्ती। उनें दस्सेआ जे रातीं 1 बज्जियै 5 मिनट सवां लेइयै डेढ बजे तोड़ी चलाए गेदे आप्रेशन सिंदूर दा मकसद पहलगाम आतंकी हमले दे साजिशकर्ताएं गी सबक सखाना ते

ओकड़े ठकानें गी नष्ट करना हा जित्थे आतंकवादिएं गी सिखलाई दिती जं'दी ऐ ते दुनिया दी शांति भंग करने लेई उनेंगी तैयार कीता जंदा ऐ। कर्नल सोफिया कुरैशी होरें दस्सेआ

तोआई, रक्षा मंत्री राजनाथ सिंह होरें अज्ज आखेआ ऐ जे भारतीय फौज नै आपरेशन सिंदूर गी अंजाम दिंदे होई अपनी बहादुरी गी दर्शाइयै इतिहास रची दिता ऐ। इस बारै बोलदे होई रक्षा मंत्री होरें आखेआ।

<><><><><><>

PM-Cabinet

प्रधानमंत्री नरेंद्र मोदी होरें अज्ज नमीं दिल्ली च केंद्री मंत्रिमंडल गी जानकारी दिंदे होई आपरेशन सिंदूर दी कामयाबी लेई थेआरबंद बलें दी सराहना कीती। श्री मोदी होरें पहलगाम आतंकी हमले दी पच्छोक्कड़ै च चलाए गेदे आपरेशन सिंदूर दी पूरी रातीं आपूं निजी तौरा पर निगरानी कीती। केंद्र सरकारै कल दिनै 11 बजे सब्भनं पार्टिएं दी इक बैठक सद्दी दी ऐ जिस दरान आपरेशन सिंदूर दे ब्यौरें ते नतीजें बारै सियासी नेताएं गी अवगत करोआया जाहगा।

<><><><><><>

Modi-Prez.

प्रधानमंत्री नरेन्द्र मोदी होरें अज्ज दपैह्नी राष्ट्रपति भवन जाइयै राष्ट्रपति द्रौपदी मुर्मु हुं'दे नै मलाटी कीती। एह मलाटी, भारत आसेआ पाकिस्तान ते पाकिस्तान दे नजैज़ कब्जे आहले जम्मू-कश्मीर दे इलाकें च आतंकवादी ठिकानें उप्पर आपरेशन सिंदूर तैह्त् कीती गेदी कार्रवाई दे किश घैंटें मगरा लाई गेई। सोशल मीडिया दी इक पोस्ट च राष्ट्रपति होरें गलाया ऐ जे बैठक दरान प्रधानमंत्री होरें उ'नेंगी आपरेशन सिंदूर दे बारै च जानकारी दिती ऐ।

<><><><><><>

HM-Meet

केन्द्री गृह मंत्री अमित शाह होरें आपरेशन सिंदूर दे मगराबने दे तनोतनी आहले हालात दे मद्देनज़र सुरक्षा सरबन्धी तैयारिएं दी समीक्षा लेईअज्ज सब्भनं बन्ने आहले राज्यें दे मुखमंत्रिएं, डीपीजी-एं ते मुख सचिवेंकन्नै इक उच्ची सतह दी बैठक लाई। जम्मू-कश्मीर, पंजाब, राजस्थान, गुजरात,उत्तराखंड, उत्तर प्रदेश, बिहार, सिक्किम ते पच्छिम बंगाल दे मुखमंत्रिएं सने लद्दाखते जम्मू-कश्मीर केन्द्र शासित प्रदेशें दे लेफ्टिनेंट गवर्नरें बी इस बैठका च हिस्सालैता। एहदे शा पैहले गृह मंत्री अमित शाह होरें लेफ्टिनेंट गवर्नर मनोज सिन्हा तेमुखमंत्री ओमर अब्दुल्ला हुंदे कन्नै गल्ल करियै सुरक्षा हालात बारै जानकारी लैती।सूत्तरें दस्सेआ ऐ जे श्री शाह होरें बीएसएफ दे डरेक्टर जनरल होरें'गी निर्देशदिता ऐ जे ओहू बन्ने आहले इलाकें दे बसनीकें दी सुरक्षा लेई सब्भनं हीलेजकीनी बनान। उनें जोर देइयै आखेआ ऐ जे आम लोकें दी सुरक्षा, सरकार दीपैहली तरजीहू ऐ।

<><><><><><>

Locals

जम्मू-कश्मीर दे मकामी लोकें बी आतंकवादिएं खलाफ पाकिस्तान ते मकबूजा कश्मीर च कीती गेदी कार्रवाई दी सराहना कीती ऐ। आकाशवाणी समाचार जम्मू कन्नै गल्ल करदे होई किश लोकें अपनी प्रतिक्रिया इस चाल्ली दिती ऐ।

<><><><><><>

LG-Review

भारती बलें आसेआ आतंकवाद दे खलाफ आपरेशन सिंदूर तैहत कीती गेदी कार्रवाई दे बाद बने दे हालात दे मद्देनजर लेफ्टिनेंट गवर्नर मनोज सिन्हा होरें बन्ने कन्नै लगदे जिलें दी समीक्षा लेई सब्भनें सीनियर प्रशासनिक, पुलस ते जिला अधिकारिएं कन्नै बैठक लाई। इस बारै अपने इक संदेस च एलजी होरें आखेआ जे सरकारै हालात पर नेडमी तक्क रक्खी दी ऐ ते ओह कुसै बी चाल्ली दे हालात कन्नै निब्बडने लेई पूरी चाल्ली तैयार ना। उंनं सरबन्धत डिप्टी कमिशनरें गी निर्देश दिते न जे ओह खतरे दी शेंका आहले इलाकें च रवै करदे लोकें गी सुरक्षित थाहें पर पुजाइयै उं'दे रौहने-बौहने सने खाने-पीने, सेहत दिक्खभाल ते आओजाई दे प्रबंधें गी जकीनी बनान। एलजी होरें इस गल्लै गी फही पक्का कीता ऐ जे प्रशासन सब्भनें बसनीकें दी सुरक्षा जकीनी बनान लेई वचनबद्ध ऐ।

<><><><><><>

CM-Emergency

मुख्यमंत्री उमर अब्दुल्ला होरें बन्ने आहले जिलें जम्मू, पुंछ, राजौरी, कठुआ, साम्बा, बारामूला, कुपवाड़ा ते बांडीपोरा दे डिप्टी कमिशनरें कन्नै एमरजेंसी वीडियो कांफ्रेंस कीती। बन्ने पारा थवां कीती जा'रदी भारी गोलीबारी दे मद्देनजर स्थिति दा जायजा लैता। उंनं हर इक बन्ने आहले जिले आस्तै 5 करोड़ ते होरनें दुए जिले लेई आपातकालीन तैयारिएं आस्तै 2 करोड़ रपे फौरी जारी करने दे निर्देश दिते। मुख्यमंत्री होरें नागरिकें दी सुरक्षा, ढांचागत सहूलतें गी मजबूत करने ते मौजूदा ते पैदा होने आहली कुसै बी स्थिति कन्नै निब्बडने लेई गलाया। ऑपरेशन सिंदूर बारै बोलदे होई मुख्यमंत्री अब्दुल्ला होरें आखेआ।

<><><><><><>

JK Killed Revised

भारती सेना नै आखेआ ऐ जे पाकिस्तान आसेआ पुंछ ते राजौरी इलाकें च इक बारी फही बड्डे स्तर पर गोलाबारी कीती जा'रदी ऐ। सोशल मीडिया दी इक पोस्ट च भारती फौजै आखेआ ऐ जे औदे आसेआ पाकिस्तान दी इस हिमाकत दा शैल बनकदा परता दित्ता जा'रदा ऐ। जानकारी मूजब पाकिस्तानी कार्रवाई च पुंछ जिले दे मनकोट इलाके च 9 जनें दी मौत होई गई ऐ। जिसलै जे 41 होरनें दे घाऽल होने दी खबर ऐ। गोलाबारी दे चलदे बसनीकें

गी सुरक्षित थाहें जा बंकरें च शरण लैनी पेई गेदी ऐ। पुंछ, उड़ी ते रजौरी जिलें च केई सैक्टरें थमां बन्ने पारा गोलाबारी दी जानकारी ऐ। तोआई एहतियात दे तौरा पर जम्मू, साम्बा, कठुआ, राजौरी ते पुंछ जिले च अज्ज सब्भनं स्कूलें, कॉलेजें ते शिक्षा इदारे गी बंद रक्खेआ गेआ।

<><><><><><>

IIT-Jammu Expension

केंद्री मंत्रिमंडल नै आई.आई.टी जम्मू सने मुल्खै दे 4 होर आई.आई.टी दे विस्तार गी मंजूरी दिती ऐ। एहदे तैहत इनें आई.आई.टी दी शैक्षणिक ते ढांचागत समर्थ च विस्तार कीता जाग। इस गैंऽ कन्नै 6 ज्हार 500 थवां मते बच्चें गी लाहू होग। आई.आई.टी जम्मू च अपनी किस्मै दा अनुसंधान पार्क विकसित कीता जाग। एहदा मकसद केंद्र शासित प्रदेश च नमिएं काडुं गी बढ़ावा देना होग। उपराज्यपाल मनोज सिन्हा होरें इस मंजूरी लेई प्रधानमंत्री नरेंद्र मोदी हुंदा धन्नवाद कीता ऐ।

<><><><><><>

Jammu Police Advisory

जम्मू पुलसै आसेआ सारे नागरिकें लेई परामर्श जारी कीता गेआ ऐ जे ओह सुरक्षा आवाजाई बारै कोई बी संवेदनशील जानकारी सांझा नैई करन ते नां गै उनेंगी अपलोड करन। इय्यै नेइएं चीजें कन्नै राश्ट्रीय सुरक्षा लेई खतरा पैदा हुंदा ऐ जेकर कोई बी इयां करदा ऐ तां फी ओदे खिलाफ सख्त कार्रवाई कीती जाग। बसनीकें गी आखेआ गेआ ऐ जे ओह जिम्मेदारी कन्नै कम्म लैन ते कनून नाफिज करोआने आहली एजेंसिएं कन्नै सहयोग करन। एह परामर्श सुरक्षा स्थिति ते मौजूदा हालात दे मद्देनजर जारी कीता गेआ ऐ।

<><><><><><>